

De Graonvrouwe vaan Lummel

Dag Graonvrouwe

*Geer zeet hei altied al gewees
vaanaof het begin toen Lummel
nog mer 'n klei boere dörp waar*

*Geer zaog dat de Romeine lang doorweeg bouwde
geer waort och debei toen later 't ierste kerkske woort opgetrokke
en de kestiele hunne naam kregte oet 't Heilige Land*

*En ieuwe later bij de enorme greuj vaan Lummel
toen febrikke geböwd woorte
en de werklui vaan alle kante
hei nao touw kaome um te kinne werke*

*Geer waort ouch bei alle consternatie
es de Maos weer veur hoeg water zörregde
en hoezer blaank stoonde*

*Bij de vreiselikke elend
die väöl werklui en hun gezin trof
door erbermelijk werkomstandighede*

*Geer zaog dat uzze Keplaon Lochtman verraaje
en mètgenome woort door de Nazi's
um noets mie trök te komme*

*Meh geer zaog och de famfaar Zjuliaan
de voelbalclub RKVCL
't vereinegingsleve
boe de lui ziech vol veur gaove*

*Gooi of slechte tije
geer Graonvrouwe, waort debei*

*Geer hób noe eindelek e geziech gekrege
en zeet verieuwig in e majestueus bronze beeld
op 'n zier biezonder plek*

*Achter uuch veult geer de werme aosem
van de wiesheid
oet alle twie de seniorenresidenties
Corona en Limale*

*Veur uuch
kiek geer
in de riechting vaan 't aaijt dörp:
geer zuut
de torenklok van Sint Jaan de Duiper
met 't kerkhof
en 't aonliggend Lochtmanhoes.*

*Geer hób 'n boetegewoen good oetziech
op 't touwkomstige Lummel:
't nui hart
met de Brei Zjaol
't winkelcentrum
en de royale spoorweegoenderdoorgaank.*

*'t Koumend decennium
staot geer
zonder uuch te verplaatse
in 't geometrisch midde vaan Lummel
es 't al 50 jaor
braokliggend Zinkwitterrein
allewijl genump
"Lummel aon de Maos"
'n feit is*

*Geer beliechaamp
'n vrouw es 't oerbeeld
es hoedster vaan 't graon
es oermam
de wijs vrouw*

*Eur kleid is 'n koreveld
boe geer doorheen loup
vol met graonsoorte en
plantmotieve
Eur han
zeije in 't vreuge veurjaor
meh op 'nne werme zomerse daag
wandeld geer gewoen druimerig
al genetend vaan de netuur
vaan de volle aore
die riep zien
um geougst te weurde*

*Eure staotige kroen
verwijs nao 't woonderlijke fenomeen
dat oonder de rouk vaan Lummel
zoeveul kestiele en landhoezer
te vinde zien:
Alleweil
de Landgoederezone genump en
in iere hersteld:
't vreugere Kestiel Limale
noe Bethlehem es Hoeg Hotelzjaol
Kestiel Jeruzalem es
hoofkentoer en opleijingscentrum veur de horeca
en de aw Pastorei
kort geleie gerinnoveerd
en allervijl bewoend
door e joenk gezin
Magnefiek toch!*

*Geer verteld 'n verhaal
met symbole, weurd en associaties*

*In eur kleid
zien eleminte
oet de rieke Lummelse historie
op symbolische wijs weergegeve,
vaan 't boere leve
nao 't groet febrik
die hunne stempel geduid hóbbe
op 't dörrepse leve*

*Och stoon d'r naome gekrets
in eur kleid vaan lui
die 'n rol hóbbe gespeuld
in 't verleie,
groete en klei naome
meh allemaal
met hun eige
wierdevolle bijdrage
aan de gemeinsjap Lummel*

*Geer staot op 'n verhuging
die rappeleerd us aon 't gevech
tege 't hoeg water
dat jaore laank heet gedoord*

*Eeders kier es veer
rontelum uuch loape
kinne veer get nults oontdekke*

*Gere wouwe veer
rontelum uuch
klaproeze en koreblomme
meh dat waors prakties
neet meugelik
wee wèt
weurt deen ambras
veur de luij vaan de seniorenresidenties
'n oetdaging:
en adoptere zie eur veldblommeperk*

*Geer zeet in allerlei vorm opegewerk
zoetot eur innerlike levensleech
nao boete kin straole
en vaan generatie op generatie
ieunwig kin weurde euvergedrage*

*Letterlik en figuurlik
kin niemes um uuch heen*

*Noe weurt eur
veurnaomste opdrach
dat alles
wat beslote weurt
euver de Lummelse touwkomst
met eure raad
weurt veurzeen*

*Graonvrouwe geer waors
en zeet sinds minsehäögenis
't gewete vaan Lummel.*

*Geer zeet vaan Lummel
en behuurt bij Lummel*

*Graonvrouwe....
"Geer zeet ein vaan us"!*

Oorspronkelijke tekst: Marianne van der Bolt – december 2012
Aangepast door Jack Ummels als gesproken tekst bij de onthulling 11 januari 2013